

BCA ta reacciona riba preocupacion encuanto tarifanan di servicionan di pago

Banco Central di Aruba (BCA) a tuma nota di e publicacionnan den medionan di prensa relaciona cu e preocupacion pa e tarifanan cu banconan comercial ta cobra pa usa servicionan di pago cu carchi y kier informa e comunidad lo siguiente.

Actualmente no tin un ley pa regula tarifanan cu e banconan local ta cobra pa uso di servicionan di pago na Aruba. E banconan comercial por stipula e tarifanan aki nan mes. Den cuadro di su ambicion pa modernisa e sistema di pago na Aruba y mehora e experiencia di pago pa e consumidor y negoshi, BCA a tuma e iniciativa pa prepara dos concepto di ley pa asina por regula e sistemanan di pago na Aruba.

Ta trata di e concepto di ley: Landsverordening



toezicht betaaldienstverleners y Landsverordening toezicht aanbieders van betalingssystemen. Actualmente e dos concepto di ley na aki ta den e proceso legislativo. Cu e concepto di ley na aki e meta di BCA ta pa establece sistemanan di pago na Aruba cu ta sigur, eficiente, confia-

bel y cu tarifanan rasonabel. Ademá, construyendo riba e éxito di e introduccion di I-Pago (BCA su sistema di pago instantáneo) na 2020, BCA tambe ta explorando solucionnan di pago innovativo pa por ehecuta pagonan di 'person-to-person', 'in-store' y 'e-commerce',



usando e sistema di I-Pago. Cu e solucionnan menciona lo introduci mas servicionan di pago cu lo contribui na un sistema di pago mas moderno pa Aruba, cual lo usa e sistema di pago instantáneo local.

Asina por tin mas control riba e tarifanan di transaccionnan di pago y tambe lo por reduci e dependencia riba rednan di

pago internacional. Relata na esaki, BCA ta colaborando cu e banconan comercial pa sigura un implementacion exitoso di e iniciativa aki.

Cu e iniciativanan menciona BCA kier sigura e comunidad cu ta haciendo esfuerzonan significante pa logra sistemanan di pago mas regula, sigur y moderno.

UNHCR a discuti publicacion riba situacion di refugiado

Gobierno no ta di acuerdo cu definicion di refugiado di UNHCR

Diamars dia 5 november Prome Minister Evelyn Wever-Croes a reuni cu UNHCR cu ta e agencia di Nacionnan Uni pa refugiadonan. Durante e reunion, señor Jose Egas, representante di UNHCR, a presenta su credencial na Prome Minister pa asina e por opera pa e region di Aruba.

Gobierno di Aruba a acredita UNHCR pa ta presente y asisti gobierno den tur reto riba tereno di refugiado. Señor Egas ta staciona na Panama y di eynan ta dirigi e trabanon den e region. A trata di un reunion impor-



tante ya cu ta esencial pa keda den dialogo cu UNHCR riba retonan grandi cu Aruba ta confronta riba tereno di migracion. Desde cu Gabinete Wever-Croes I a sinta na aña

2017 tabata existi un crisis migratorio, unda paso a paso Gobierno mes a profesionalisa y introduci un sistema di asilo den cual UNHCR ta yuda Gobierno mehora esaki.

Un tema importante cu a toca durante e reunion ta e echo cu UNHCR recientemente

a publica un estudio den cual nan a conclui cu 1 den cada 5 persona cu ta biba na Aruba ta un refugiado. Riba esaki Gobierno di Aruba no ta di acuerdo cu UNHCR. E interpretacion di UNHCR di un refugiado na Aruba ta tur hende cu no a nace na Aruba y a bin biba na Aruba, of esnan cu tin permiso of tin hopi aña ta biba na Aruba, y talbes ya a nacionalisa, pa UNHCR, esey ta e grupo di refugiado na Aruba.

Pa Gobierno di Aruba, e definicion di un refugiado ta diferente. Segun tratadonan internacional cu Aruba ta aplica, un refugiado ta un persona cu ta bandona su pais, huy pa su bida y ta busca proteccion den nos pais. Esnan cu haya e proteccion na

Aruba, pero hasta si papia di esnan cu ta busca proteccion, e cifra actual ta di alrededor di 1000 persona cu tin un peticion pa asilo pendiente, y 1000 persona no ta ni 1 % di e poblacion di Aruba. Nificando cu no ta 1 di cada 5, pero 1 di cada 100 persona por wordo considera un refugiado na Aruba.

“Pa Gobierno di Aruba ta di gran importancia pa señala y aclara e diferencia aki pasobra e publicacion di UNHCR a hala hopi atencion y preocupacion na Aruba y na Hulanda. Pero manera mi a indica, UNHCR tin un definicion di un refugiado cu nos no ta di acuerdo cune. Mi ta reitera cu nos como Gobierno di Aruba ta aplica e tratado di Nacionnan Uni, cu esun cu ta huy pa su bida, y busca proteccion na Aruba, nos ta considera un refugiado. A trata di un reunion intenso pero fructifero. Mi ta contento cu UNHCR y Gobierno di Aruba ta trahando hunto pa adresa tur e reto cu tin riba tereno di e crisis migratorio cu Aruba ta enfrenta. Varios paisnan grandi ta enfrentando retonan similar, pero mi ta hopi orguyoso di mira con Aruba ta atende y cu e tema aki”, Prome Minister a indica.



Directie Financiën y Centrale Accountantsdienst ta informa cu diabierna 8 november 2024 nos lo ta cera pa publico henter dia pa motibo di un personeelsbijeenkomst.

Nos lo reanuda nos servicionan normal riba dialuna 11 di november 2024.

Masha danki pa e comprension.